

Obraćanje prvog zamjenika visokog predstavnika Davida Robinsona na 17. godišnjici helikopterske nesreće na Prokoškom jezeru

Vrijedi izgovorena riječ.

Predanost građanima Bosne i Hercegovine

Odajući čast našim kolegama koji su poginuli na ovom mjestu prije 17 godina, razmišljamo o njihovoj predanosti i posvećenosti svih onih koji rade za budućnost Bosne i Hercegovine.

Riječ je o predanosti zasnovanoj na uvjerenju da dobro koje postoji u većini ljudi mora pobijediti zlo koje postoji u maloj manjini, na uvjerenju da se najzahtjevniji praktični problemi mogu riješiti trudom i dovitljivošću.

Imao sam privilegiju da učestvujem u mirovnim operacijama u raznim dijelovima svijeta. U nekim mjestima pomirenje i oporavak se susreću s ozbiljnim izazovima, ali moje iskustvo govori da je želja za mirom, želja za pravdom neminovno jača od spremnosti da se pribjegne sukobima.

Puno puta sam vidio da su, bez obzira na nazadovanja i na pogrešne poteze, mogući konstruktivni ishodi.

Ova komemoracija jedan je od prvih zvaničnih događaja u kojima učestvujem kao prvi zamjenik visokog predstavnika i mislim da je to prikladno. Jer, kada se sjetimo žrtve naših kolega sjetimo se koliko su bili ozbiljni u namjeri koja ih je dovela u Bosnu i Hercegovinu i trajne vrijednosti onoga što su pokušavali da postignu.

Danas, 2014. godine, imamo isti cilj. Nastavljamo raditi kako bismo ispunili iste ciljeve na kojima smo radili i ranije, a to je da pomognemo građanima Bosne i Hercegovine da izgrade suverenu, sigurnu i prosperitetnu demokratiju.

Nakon dugotrajnog perioda koji su obilježile ekonomske poteškoće i politički zastoj, dodatno pogoršani prirodnim i industrijskim katastrofama tokom proteklih nekoliko mjeseci, građani ove zemlje se spremaju da izađu na birališta, nadamo se u što većem broju. Koga god građani izaberu može računati na kontinuiranu podršku međunarodne zajednice. Mi smo opredijeljeni u namjeri da pomažemo Bosni i Hercegovini i njenim građanima da se oporave od sukoba i nastaviti ćemo da radimo sve do ispunjenja ove obaveze.

Danas odajemo počast i sjećamo se Petera Backesa, Livija Beccaccia, Andrzeja Bulera, Davida Kriskovicha, Leah Melnick, Charlesa Morpetha, Williama Nesbitta, Marvina Padgetta, Thomasa Reinhardta, Jurgena Schaufa, Georga Stieblera i Gerda Wagnera.

Sjećajući se nesreće koja se ovdje dogodila prije 17 godina, uvjeren sam da se trebamo fokusirati na hrabrost i uvjerenje naših kolega koji su izgubili svoje živote. Njihova hrabrost, njihovo uvjerenje, njihov optimizam nisu nestali na ovoj planini.

Prisjećamo ih se na najsmisleniji mogući način – obnavljajući naše opredjeljenje za postizanje plemenitog cilja na kojem su radili u vrijeme njihove pogibije, cilja kome teže građani Bosne i Hercegovine.